



【传忠书局刊刻】

曾文正公全集

曾国藩 著

李瀚章 编撰 李鸿章 校刊

〔第十二卷〕

首卷·年谱·求阙斋日记类钞·家书

线装书局

版权页

（传忠书局刊刻·足本）

图书在版编目（CIP）数据

曾文正公全集：全 12 册 / （清）曾国藩著；李瀚章编撰. —北京：线装书局，2012.1

ISBN 978-7-5120-0454-2

I .①曾... II .①曾...②李... III .①曾国藩（1811～1872）—全集 IV .
①Z425.2

中国版本图书馆 CIP 数据核字（2011）第 259875 号

曾文正公全集

作者：曾国藩

编撰：李瀚章

校刊：李鸿章

责任编辑：杜语高晓彬李津红

装帧设计：高欣彭彭

出版发行：线装书局

地址：北京市西城区鼓楼西大街 41 号（100009）

电话：010-64045283 64041012

网址：www.xzhbc.com

经销：新华书店

印刷：北京楠萍印刷有限公司

开本：787×1092 1/16

印张：334.75

字数：6800 千字

版次：2012 年 1 月第 1 版 2012 年 1 月第 1 次印刷

印数：1-3000

书号：ISBN 978-7-5120-0454-2

定价：680.00 元（全 12 册）

目 录

十八家诗钞 卷二十二	1
十八家诗钞 卷二十三	44
十八家诗钞 卷二十四	91
十八家诗钞 卷二十五	143
十八家诗钞 卷二十六	196
十八家诗钞 卷二十七	233
十八家诗钞 卷二十八	272
曾文正公杂著	314
曾文正公杂著 卷一	314
曾文正公杂著 卷二	338
曾文正公杂著 卷三	368
曾文正公杂著 卷四	395

十八家诗钞 卷二十二

苏东坡七律下二百八十二首

和王旂二首

异时长怪谪仙人，舌有风雷笔有神。闻道骑鲸游汗漫，忆尝扪虱话悲辛。气吞余子无全目，诗到诸郎尚绝伦。白发故交空掩卷，泪河东注问苍旻。

袅袅春风送度关，娟娟霜月照生还。迟留岁暮江淮上，来往君家伯仲间。未厌冰滩吼新洛，且看松雪媚南山。野梅官柳何时动，飞盖长桥待子闲。

次韵张琬

施注：是时有两张琬。一韩城人，父昇，枢密使，归老嵩少。元祐初，琬自齐州倅求便养亲，两易卫尉丞，以才擢知秀州。崇宁间，为广东转运副使，移京东西路。又一鄱阳人，治平二年登第。诗中有“临淮自古多名士”之句，临淮乃泗邑，疑自有一张琬，而二人者皆非也。姑载于此，以俟知者正之。

新洛霜余两岸隆，尘埃举袂识西风。临淮自古多名士，樽酒相连乐寓公连：一作从。半日偷闲歌啸里，百年暗尽往来中。知君不向穷愁老，尚有清诗气吐虹。

赠梁道人

采药壶公处处过，笑看金狄手摩挲。老人大父识君久，造物小儿如子何。寒尽山中无历日，雨斜江上一渔蓑。神仙护短多官府，未厌人间醉踏歌。

泗州南山监仓萧渊东轩二首

偶随樵父采都梁山自注：南山，名都梁山，出都梁香故也，竹屋松扉试乞浆。见东轩堪隐几，不知公子是监仓。溪中乱石墙垣古，山下寒蔬匕箸香。我是江南旧游客，挂冠知有老萧郎。

北望飞尘苦昼霾，洗心聊复寄东斋。珍禽声好犹思越，野橘香清未过淮。有信微泉来远岭，无心明月转空阶。一官仓庾真堪老，坐看松根落断崖。

泗州除夜雪中黄师是送酥酒二首

暮雪纷纷投碎米，春流活活走黄沙活活：一作咽咽。旧游似梦徒能说，迁客如僧岂有家迁：一作逐。冷砚欲书先自冻，孤灯何事独成花成：一作生。使君半夜分酥酒，惊起妻孥一笑哗。

关右土酥黄似酒，扬州云液却如酥。欲从元放觅拄杖，忽有麴生来坐隅。对雪不堪令饱暖，隔船应已厌歌呼。明朝积玉深三尺，高枕床头尚一壶。

章钱二君见和复次韵答之二首

黄昏已作风翻絮，半夜犹惊月在沙。照汴玉峰明佛刹，隔淮云海暗人家。来牟有信迎三白，蓂蒿无香散六花。欲唤阿咸来守岁，林乌枥马斗欢哗欢：一作喧。

分无纤手裁春胜，更有新诗点蜀酥。醉里冰髭失纓络，梦回布被起廉隅。君应旅睫寒生晕，我亦饥肠夜自呼。明日南山春色动，不知谁佩紫微壶。

书刘君射堂

《集》本云：刘乙新作射堂。公自注：乙父尝知眉州。

兰玉当年刺史家，双鞬驰射笑穿花。而今白首闲骢马，只有清樽照画蛇。寂寂小轩蛛网遍，阴阴垂柳雁行斜。手柔弓燥春风后，置酒看君中戟牙。

留题兰皋亭

雪夜东风未肯和，叩门迁客夜经过。不知旧竹生新笋，但见清伊换浊河。无复往来乘下泽，聊同笑语说东坡。明年我亦开三径，寂寂兼无雀可罗。

和人见赠

只写东坡不著名，此身已是一长亭。壮心无复春流起，衰鬓从教病叶零。知有雪儿供笔砚，应嗤灶妇洗盆瓶。回来索酒公应厌，京口新传作客经。

和田仲宣见赠

头白江南醉司马，宽心时复唤殷兄。寒潮不应淮无信，客路相随月有情。未许低头拜东野，徒言共饮胜公荣。好诗恶韵那容和，刻烛应须便置觥。

记梦 并序

乐全先生梦人以诗三篇示之，字皆旁行而不可识。旁有人道衣古貌，为读其中一篇云：“人事且常在，留质悟圆间。”凡四句，觉而忘其二，以告其客苏轼。轼以私意广之云。

圆间有物物间空，岂有圆空人井中。不信天形真个样，故应眼力自先穷。连环易解如神手易：一作已，万窍犹号未济风。稽首问公公大笑，本来谁碍更求通。

与欧育等六人饮酒

忽惊春色二分空，且看樽前半丈红。苦战知君便白羽，倦游怜我忆黄封。年来齿发老未老，此去江淮东复东。记取六人相会处，引杯看剑坐生风。

和仲伯达

归山岁月苦无多，尚有丹砂奈老何。绣谷只应花自染，镜潭长与月相磨。君方傍海看初日，我已横江击素波。人不我知斯我贵，不须雷雨起龙梭。

送竹几与谢秀才

平生长物扰天真，老去归田只此身。留我同行木上座，赠君无语竹夫人。但随秋扇年年在，莫斗琼枝夜夜新。堪笑荒唐玉川子，暮年家口若为亲。

次韵许遵

蒜山渡口挽归艎，朱雀桥边看道装。供帐已应烦百两，击鲜无久溷诸郎。问禅时到长干寺，载酒闲过绿野堂。此味只忧儿辈觉，逢人休道北窗凉。

送穆越州

穆名珣，字东美。

江海相忘十五年，羡公松柏蔚苍颜。四朝耆旧冰霜后，两郡风流水石间。旧政犹传蜀父老，先声已振越溪山。樽前俱是蓬莱守，莫放高楼雪月闲。

赠葛苇

竹椽茅屋半摧倾，肯向蜂窠寄此生。长恐波头卷室去，欲将船尾载君行。小诗试拟孟东野，大草闲临张伯英。消遣百年须底物，故应怜我不归耕。

次韵送徐大正

公自注：尝与余约卜邻于江淮间。将赴登州，同舟至山阳，以诗见送，留别。

别时酒盏照灯花，知我归期渐有涯。去岁渡江萍似斗，今年并海枣如瓜。多情明月邀君共，无价青山为我赊。千首新诗一竿竹，不应空钓汉江槎。

次韵徐积

杀鸡未肯邀季路，裹饭先须问子来。但见中年隐槐市，岂知平日赋兰台。海山入梦方东去，风雨留人得暂陪。若说峨眉眼前事，故乡何处不堪回。

过密州次韵赵明叔乔禹功

先生依旧广文贫，老守时遭醉尉瞋。汝辈何曾堪一笑，吾侪相对复三人。黄鸡唱晓凄凉曲，白发惊秋见在身。一别胶西旧朋友，扁舟归钓五湖春。

登州孙氏松堂

万松谁种已，半岭苍云映此邦。露重珠璎蒙翠盖，风来石齿碎寒江。浮空两竹横南阁，倒影扶桑射北窗。坐待夕烽传海峤，重城归去踏逢逢。

次韵赵令铄

东坡已报六年穰，惆怅红尘白首郎。枕上溪山犹可见，门前冠盖已相望。故人年少真琼树，落笔风生战堵墙。端向瓮间寻吏部，老来专以醉为乡。

次韵王定国得颖悴二首

仙风入骨已凌云，秋水为文不受尘。一噫固应号地籁，余波犹足挂天绅。买牛但自捐三尺，射鼠何劳挽六钧。莫向百花潭上去，醉翁不见与谁亲。

滔滔四海我知津，每愧先生植杖耘。自少多言晚闻道，从今闭口不论文。滟翻白兽樽中酒，归煮青泥坊底芹。要识老僧无尽处，床前牛蚁不曾闻。

次韵王震

自此以上，皆黄州、常州居住，暨自登州将还朝之诗。

携文过我治平间，雾豹当时始一斑。闻道吹嘘借余论，故教流落得生还。清篇带月来霜夜，妙语先春发病颜。诗酒暮年犹足用，竹林高会许时攀。

次韵周邠

自此以下，入朝为起居舍人、翰林学士以后之诗。

南迁欲举力田科，三径初成乐事多。岂意残年踏朝市，有如疲马畏陵坡。羨君同甲心方壮，笑我无聊鬓已皤。何日西湖寻旧赏，淡烟疏雨暗渔蓑。

次韵胡完夫

完夫名宗愈，晋陵人，副枢宿之侄。

青衫别泪尚斓斑，十载江湖困抱关。老去上书还北阙，朝来拄笏看西山。相从杯酒形骸外，笑说平生醉梦间。万事会须咨伯始，白头容我占清闲。

次韵钱穆父

老入明光踏旧班，染须那复唱阳关。故人飞上金銮殿，病客来从饮裹山病：《集》作迂。大笔推君西汉手，一言置我老刘间老刘：《集》作二刘。公自注：公行轼告词，引董仲舒、刘向事。便须置酒呼同舍，看赐飞龙出帝闲。

次韵穆父舍人再赠之什

诏语春温昨夜班，屋头鸣便关关。游仙梦觉月临幌，贺雨诗成云满山。怜我白头来仗下，看君黄气发眉间。凤池故事同机务，火急开樽及尚闲。

再次韵答完夫穆父

公自注：二公自言，先世同在西掖。

掖垣老吏识郎君吏：一作史，并辔天街两绝尘。汗血固应生有种，夜光那复困无因。岂知西省深严地，也著东坡病瘦身。免使谪仙明月下，狂歌对影只三人。

次韵答满思复

自甘茅屋老三间，岂意彤廷缀两班。纸落云烟供醉后，诗成珠玉看朝还。谁言载酒山无贺，记取啼乌巷有颜。但恐跛样随赤骥，青云飞步不容攀。

和人假山

上党搀天碧玉环，绝河千里抱商颜。试观烟雨三峰外，都在灵仙一掌间。造物何如童子戏，写真聊发使君闲。何当挈取西征去，画作围床六曲山。

次韵子由送千之侄

江上松楠深复深，满山风雨作龙吟。年来老干都生菌，下有孙枝欲出林。白发未成归隐计，青山饶有济时心。闭门试草三千牍，仄席求人少似今。

次韵钱舍人病起

床下龟寒且耐支，杯中蛇去未应衰。殿门明日逢王傅，櫺具争先看不疑。坐觉香烟携袖少，独愁花影上廊迟。何妨一笑千疴散，绝胜仓公饮上池。

次韵朱光庭初夏

朝罢人人识郑崇，直声如在覆声中。卧闻疏响梧桐雨，独咏微凉殿阁风。谏苑君方续承业，醉乡我欲访无功。陶然一枕谁呼觉，牛蚁初除病后聪。

送贾讷悴眉二首

当年入蜀叹空回，未见峨眉肯再来。童子遥知颂襦袴，使君先已洗樽罍。公自注：李大夫，眉之贤守也。鹿头北望应逢雁，人日东郊尚有梅。公自注：人日出东郊，渡江，游蟆颐山，眉之故事也。我老不堪歌乐职，后生试觅子渊才。

老翁山下玉渊回，手植青松三万栽。父老得书知我在，蓬蒿亲手为君开。试看一一龙蛇舞，更听萧萧风雨哀。便与甘棠同不剪，苍髯白甲待归来。公自注：先君葬于蟆颐山之东二十余里，地名老翁泉，君许为一往。感叹之深，故及之。

次韵李修孺留别二首

十年流落敢言归，鱼鸟江湖只自知。岂意青天扫云雾，尽呼黄发寄安危。风流吾子真前辈，人物他年记一时。我欲折留此老，缁衣谁作好贤诗。

此生别袖几回麾，梦里黄州空自疑。何处青山不堪老，当年明月巧相随。穷通等是思家意，衰病难堪送客悲。好去江鱼煮江水，剑南归路有姜诗。

和周正孺坠马伤手

平生学道已神完，岂复儿童私自怜。醉坠何曾伤内守，色忧当为念先传。书空渐觉新诗健，把蟹行看乐事全。卖却老骠为酒直，大呼乡友作新年。

潘推官母李氏挽辞

南浦凄凉老逐臣，东坡还往尽幽人。杯盘惯作陶家客，祥：一作盘，弦诵尝叨孟母邻。尚有升堂他日约，岂知负土一阡新。今年我欲江湖去，暮雨连山宰树春。

玉堂栽花周正孺有诗次韵

故山桃李半荒榛，粗报君恩便乞身。竹簟暑风招我老，玉堂花蕊为谁春。纤纤翠蔓诗催发，皎皎霜葩发斗新。只有来禽青李帖，他年留与学书人。

杜介送鱼

新年已赐黄封酒，旧老仍分赅尾鱼。陋巷关门负朝日，小园除雪得春蔬。病妻起斫银丝鲙，稚子欢寻尺素书。醉眼朦胧觅归路，松江烟雨晚疏疏。

送杜介归扬州

再入都门万事空，闲看清洛漾东风。当年帷幄几人在，回首觚棱一梦中。采药会须逢蓟子，问禅何处识庞翁。归来邻里应迎笑，新长淮南旧桂丛。

次韵张昌言给事省宿

冯颠久已欹残雪，戎眼何曾眩落晖。朔野按行犹爵跃，东台暝坐觉乌飞公自注：道家有乌飞入兔宫之说。漫夸年少容吾在公自注：乐天诗云：“犹有夸张少年处，笑呼张丈唤殷兄。”，若斗樽前举世稀。待向嵩阳求水竹，一犁烟雨伴公归。

送钱承制赴广西路分都监

当年我作表忠碑，坐觉江山气未衰。舞凤尚从天目下，收驹时有渥洼姿。踞床到处堪吹笛，横槊何人解赋诗。知是丹霞烧佛手，先声应已慑群夷。

次韵曾子开从驾二首

槐街绿暗雨初匀，瑞雾香风满后尘。清庙幸同观济济，丰年喜复接陈陈。雍容已饫天庖赐，俯伏初尝贡茗新。辇路归来闻好语，共惊尧颡类高辛。

入仗魂惊愧草莱，一声清蹕九门开。晖晖日傍金舆转，习习风从玉宇来。流落生还真一芥，周章危立近三槐公自注：学士班近执政。道旁傥有山中旧，问我收身蚤晚回。

再和

眼花错莫鬓霜习，病马羸驹只自尘。奉引拾遗叨侍从，思归少傅羨朱陈。衰年壮观空惊目，险韵清诗苦斗新。最后数篇君莫厌，捣残椒桂有余辛。

忆观沧海过东莱，日照三山迤邐开。桂观飞楼凌雾起，仙幢宝盖拂天来。不闻宫漏催晨箭，但觉檐阴转古槐。供奉清班非老处，会稽何日乞方回公自注：时方阙会稽守。

次韵贡父省上

密云今日破郊西，疏雨潇潇未作泥。要及清闲同笑语，行看衰病费扶持。花前白酒倾云液，户外青骢响月题。不用临风苦挥泪，君家自与竹林齐公自注：贡父诗中有不及与其兄原甫同时之叹，然其兄子仲冯今为起居舍人。

再和

当年曹守我胶西，共厌铺糟与汨泥。自古赤丸成习俗，因公黄犊免提携。生还各有青山兴，病起犹能小字题。莫怪歌呼数相和，曾将狱市寄全齐公自注：贡父为曹州，盗贼皆奔邻境。尝有诗云：“从教晋盗稍奔秦。”。

和张昌言喜雨

二圣忧勤忘寝食，百神奔走会风云。禁林夜直鸣江濑，清洛朝回起縠纹。梦觉酒醒闻好语，帐空簟冷发余薰。秋来定有丰年喜，剩作新诗准备君。

次韵刘贡父西省种竹

要知西掖承平事，记取刘郎种竹初。旧德终呼名字外，后生谁续笑谈余公自注：昔李公择种竹馆中，戏语同舍：“后人指此竹，必云李文正手植。”贡父笑曰：“文正不独系笔，亦知种竹邪？”时有笔工李文正。成阴障日行当见，取笋供庖计已疏。白首林间望天上，平安时报故人书。

次韵刘贡父独直省中

明窗畏日晓先曷，高柳鸣蜩午更喧。笔老新诗疑有物，心空客疾本无根。隔墙我亦眠风榻，上马君先琐月轩。共喜蚤归三伏近，解衣盘礴亦君恩。

次韵张昌言喜雨

千里黄流失故居，年来赤地到青徐。遥闻争诵十行诏，无异亲巡六尺舆。精贯天人一言足，云兴岳渎万灵趋。爱君谁似元和老，贺雨诗成即谏书。

次韵孔常父送张天觉河东提刑

送君应典鹓鹓裘，凭仗千钟洗别愁。脱帽风流余长史公自注：君喜草书而不工，故以此为戏，埋轮家世本留侯公自注：张纲，子房七世孙也，犍为武阳人，墓在今彭山。君岂其后邪。子河骏马方争出公自注：麟府马出子河汉，昭义疲兵得少休公自注：唐称昭义步兵，盖泽潞弓箭手。定向秋山得佳句，故关黄叶满行舟。

次韵王定国悴扬州

此身江海寄天游，一落红尘不易收。未许相如还蜀道，空教何逊在扬州。又惊白酒催黄菊，尚喜朱颜映黑头。火急著书千古事，虞卿应未厌穷愁。

次韵张舜民自御史出悴虢州留别

玉堂给札气如云，初起湘累复佩银。樊口凄凉已陈迹公自注：昔与张同游武昌樊口，来诗中及之，班心突兀见长身公自注：台史谓御史立处为班心。江湖前日真成梦，鄂杜他年恐卜邻。此去若容陪坐啸，故应客主尽诗人。

次韵刘贡父所和韩康公忆持国二首

梦觉真同鹿覆蕉，相君脱屣自参寥。颜红底事发先白，室迩何妨人自遥。狂似次公应未怪，醉推东阁不须招。援毫欲作衣冠表，盛事终当继八萧。

闭户端居念独深，小轩朱槛忆同临。燎须谁识英公意，黄发聊知子建心。已托西风传绝唱，且邀明月伴孤斟。他时内集应呼我，下客先拼醉堕簪。

次韵刘贡父叔侄扈驾

玉堂孤坐不胜清，长羨枚邹接长卿。只许隔墙闻置酒，时因议事得联名。机云似我多遗俗，广受如君不治生。共托属车尘土后，钧天一饷梦中荣。

次韵韩康公置酒见留

庭下黄花一醉同，重来雪已穹窿。不应屡费讥安石，但使无多酌次公。钟乳金钗人似玉，鶺鴒弦铁拨坐生风。少卿尚有车茵在，颇觉宽容胜弱翁。

次韵王都尉偶得耳疾

君知六凿皆为赘，我有一言能决疣。病客巧闻床下蚁，痴人强觑棘端猴。聪明不在根尘里，药饵空为仆婢忧。但试周郎看聋否，曲音小误已回头。

和宋肇游西池次韵

汉皇慈俭不开边，尚教千艘下濂船。贪看滕艚飞斗槛，不知鼉舞钧天。故山西望三千里，往事回思二十年。自笑区区足官府，不如公子散神仙。

仆领贡举未出钱穆父雪中作诗见及三月二十日同游金明池始见其诗次韵为答

雪知我出已全消，花待君来未敢飘。行避门生时小饮，忽逢骑史有嘉招。鱼龙绝技来千里，斑白遗民数四朝。知有黄公酒垆在，苍颜华发自相遥。

次韵子由五月一日同转对

施注：元祐三年五月一日，公以翰林学士兼侍读、文定以户部侍郎同对。先是，公发策试廖正一馆职，问王莽、曹操事。侍御史王明叟觐奏论为以非是，韩川、赵挺之亦攻之。公屡疏丐去。故诗有“忧患半生”、“归休上策”云云。结用赵尧事，言事宫中必有所指也。

跪奉新书笏在腰，谈王正欲伴耕樵。晋阳岂为一门事，宣政聊同五月朝。忧患半生联出处，归休上策蚤招要。后生可畏吾衰矣，刀笔从来错料尧。

次韵许冲元送成都高士敦钊辖

移中老监本虚名，懒作燕山万里行。坐看飞鸿迎使节，归来骏马换倾城。高才本不缘勋阀，余力还思治蜀兵。西望雪山烽火尽，不妨樽酒寄平生。

卧病逾月请郡不许复直玉堂十一月一日锁院是日苦寒诏赐官烛
法酒书呈同院

微霰疏疏点玉堂，词头夜下揽衣忙。分光玉烛星辰烂，拜赐宫壶
雨露香。醉眼有花书字大，老人无睡漏声长。何时却逐桑榆暖，社酒
寒灯乐未央。

次韵王定国会饮清虚堂

何逊扬州又几年，官梅诗兴故依然。何人可复间季孟，与子不妨
中圣贤。卜筑君方淮上郡，归心我已剑南川。此身正似蚕将老，更尽
春光一再眠。

夜直玉堂携李之仪端叔诗百余首读至夜半书其后

玉堂清冷不成眠，伴直难呼孟浩然。暂借好诗消永夜，每逢佳处
辄参禅。愁侵砚滴初含冻，喜人灯花欲斗妍。寄语君家小儿子，他时
此句一时编。

范景仁和赐酒烛诗复次韵谢之

公自注：时公方进新乐。

笙磬分均上下堂，游鱼舞兽自奔忙。朱弦初识孤桐韵公自注：旧
乐金石声高而丝声微，今乐金石与丝声皆著，玉琯犹闻柜黍香公自注：
旧法以尺生律，今以黍定律，以律生尺。万事今方咨伯始，一斑我亦
愧真长。此生会见三雍就，无复辽辽叹未央。

次韵刘贡父春日赐幡胜

宽诏随春出内朝，三军喜气挟狐貂。镂银错落翻斜月，剪彩缤纷
舞庆霄。腊雪强飞才到地，晓风偷转不惊条。脱冠径醉应归卧，便腹
从人笑老韶公自注：前一日微雪，是日幕次赐酒。

再和

与君流落偶还朝，过眼纷纶七叶貂。莫笑华颠飘彩胜，几人黄壤
隔青霄。行吟未许穷骚雅，坐啸犹能出教条。记取明年江上郡，五更
春枕梦春韶。

叶公秉王仲至见和次韵答之

袵绡方暑亦堪朝，岁晚凄风忆皂貂。共喜鹓鸾归禁籞，心知日月在重霄。君如老骥初遭络，我似枯桑不受条。强镊霜须簪彩胜，苍颜得酒尚能韶。

再和

衰迟何幸得同朝，温劲如君合珥貂。谁惜异材蒙径寸，自惭枯枿借凌霄。光风泛泛初浮水，红糝离离欲缀条。后日一樽何处共，奉常端冕作成韶。

王郑州挽词

羨君华发起琳宫，右辅初还鼓角雄。千里农桑歌子产，一时冠盖慕萧嵩。那知聚散春粮外，便有悲欢过隙中。京兆同僚几人在，犹思对案笔生风公自注：吾为开封府幕，与子难同厅。

送吕昌朝知嘉州

不羨三刀梦蜀都，聊将八咏寄东吴。卧看古佛凌云阁，敕赐诗人明月湖。得句会应缘竹鹤，思归宁复为莼鲈。横空好在修眉色，头白犹堪乞左符。

次韵黄鲁直寄题郭明父府推颍州西斋二首

树头啄木常疑客，客去而瞋定不然。脱辖已应生井沫，解衣聊复起庖烟。平生诗酒真相污，此去文书恐独贤。蚤晚西湖哄华发，小舟翻动水中天。

寂寞东京月旦州，德星无复缀珠旒。莫嗟平輿空神物輿：去声，尚有西斋接胜流。春梦屡寻湖十顷，家书新报橘千头。雪堂亦有思归曲，为谢平生马少游。

次韵秦少章和钱蒙仲

碧畦黄陇稻如京，岁美人和易得情。鉴里移舟天外思，地中鸣角古来声。山围故国城空在，潮打西陵意未平。二子有如双白鹭，隔江相照雪衣明。

次韵钱越州

施注：钱越州穆父先赋群字韵诗，东坡次其韵，钱又和，寄坡，复次其韵。先是，东坡起流落中，掌二制，勇于报国，不为顾虑，且

复疏于言语。是时众贤虽聚本朝，而已有洛党、川党、朔党之语，言路多以谤讪诬之。二圣察其忠荃，不以为罪，诸公无以泄其怒，凡所荐引如黄鲁直、欧阳叔弼、王定国、秦少游，皆被弹劾，无得免者。公乃屡章乞去，历辩谤伤。元祐四年三月，除龙图阁学士知杭州，而穆父时以京尹坐奏狱空事守越。正言刘器之谓责之太薄。钱与公以气类厚善，故此诗末章云：“年来齿颊生荆棘，习气因君又一言。”后又和云：“欲息波澜须引去，吾侪岂独坐多言。”意皆有在也。

髯尹超然定逸群，南游端为访云门。谪仙归侍玉皇案，老鹤来乘刺史。已觉簿书哀老子，故知筴豆有司存。年来齿颊生荆棘，习气因君又一言。○以上皆官翰林学士之诗，以下又出守杭州。

去杭州十五年复游西湖用欧阳察判韵

我识南屏金鲫鱼，重来拊槛散斋余。还从旧社得心印，似省前身觅手书。葑合平湖久芜没，人经丰岁尚凋疏。谁怜寂寞高常侍，老去狂歌忆孟诸。

送子由使契丹

云海相望寄此身，那因远适更沾巾。不辞驿骑凌风雪，要使天骄识凤麟。沙漠回看清禁月，湖山应梦武林春。单于若问君家世，莫道中朝第一人。

次韵答刘景文左藏

我老诗坛仆鼓旗，借君佳句发良时。但空贺监杯中物，莫示孙郎帐下儿。夜烛催诗金烬落，秋芳压帽露华滋。故应好语如爬痒，有味难名只自知。

坐上复借韵送岢岚军通判叶朝奉

云间蹋白看缠旗，莫忘西湖把酒时。梦里吴山连越峤，樽前羌妇杂胡儿。夕烽过后人初醉，春雁来时雪未滋。为问从军真乐否，书来粗遣故人知。

始于文登海上得白石数升如芡实可作枕闻梅丈嗜石故以遗其子子明学士子明有诗次其韵